

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA : Y.B. DR AZMAN BIN ISMAIL  
(KUALA KEDAH)**

**PERTANYAAN : LISAN**

**TARIKH : 17.11.2016**

**Y.B. DR AZMAN BIN ISMAIL [ KUALA KEDAH ]** minta **MENTERI KEWANGAN** menyatakan sebab-sebab kelemahan nilai Ringgit yang berterusan lama kali ini, khususnya berbanding matawang Thai dan Arab Saudi.

**JAWAPAN**

Tuan Yang di-Pertua,

Pada amnya, sebagai sebuah negara yang terbuka dan terdedah kepada ekonomi dunia, Malaysia turut terjejas berikutan ketidaktentuan ekonomi global termasuk kejatuhan nilai mata wang Ringgit Malaysia. Nilai mata wang ringgit telah menyusut sebanyak 18.6% pada tahun 2015. Penyusutan ini bukanlah suatu kes terpencil

dan ianya didorong oleh faktor dalaman dan luar negeri seperti yang turut dialami oleh mata wang serantau. Hakikatnya, 123 daripada 149 mata wang dunia yang lain turut mengalami penyusutan nilai berbanding dolar AS disebabkan oleh pengukuhan dolar AS. Seperti mana-mana sistem kadar pertukaran, volatiliti mata wang, termasuk ringgit adalah sesuatu yang mungkin berlaku, terutamanya dalam persekitaran global yang tidak menentu.

Namun begitu, trend penyusutan ini telah beralih arah pada tahun 2016. Sehingga 25 Oktober 2016, ringgit menambah nilai sebanyak 2.8% berbanding dolar AS. Penambahan nilai ringgit disebabkan oleh aliran masuk dana portfolio berikutan sentimen pelabur yang lebih baik didorong oleh faktor luaran dan domestik. Selain itu, faktor-faktor utama yang menyokong kekuatan ringgit termasuk kadar faedah yang rendah atau negatif dalam beberapa ekonomi utama dan pemulihan harga minyak mentah dunia dari paras terendah pada tahun 2015. Seterusnya, pertumbuhan mapan ekonomi Malaysia yang disokong oleh permintaan domestik yang kukuh, komitmen Kerajaan terhadap konsolidasi fiskal dan komunikasi yang berkesan bagi memperbetulkan persepsi mengenai kebergantungan Malaysia terhadap hasil pendapatan daripada minyak mentah telah meningkatkan sentimen pelabur dan menyokong aliran masuk dana portfolio ke dalam Malaysia.

Sehubungan itu, Kerajaan telah mengambil pelbagai langkah untuk mengukuhkan nilai ringgit. Ketidaktentuan yang berlarutan dalam persekitaran ekonomi global memberi kesan kepada kadar pertukaran mata wang. Dalam menangani volatiliti nilai ringgit dalam jangka masa pendek, Bank Negara Malaysia (BNM) menjalankan intervensi dua hala dalam pasaran pertukaran asing untuk mengawal tekanan aliran modal. Usaha-usaha juga dilaksanakan bagi membangun dan memperdalam pasaran pertukaran asing dalam negeri dari segi saiz dan instrumen bagi membolehkan industri dan peniaga tempatan mengurus risiko terhadap volatiliti mata wang. Dalam jangka masa panjang pula, nilai ringgit didorong oleh kekuatan asas ekonomi negara. Dalam hal ini, usaha untuk mentransformasikan ekonomi termasuk mempelbagaikan sumber pertumbuhan, pembaharuan fiskal dan langkah untuk memastikan sistem kewangan yang kukuh dan stabil akan dapat memberi sokongan ke arah pengukuhan nilai ringgit.

Tuan Yang di-Pertua,

Walaupun usaha-usaha Kerajaan dalam mengukuhkan nilai ringgit telah membuahkan hasil, namun adalah penting untuk diketahui

bahawa sebagai sebuah ekonomi terbuka, negara kita terdedah kepada ketidakpastian ekonomi global, termasuklah ketidakpastian dasar monetari ekonomi maju dan tren harga minyak mentah global. Perkara ini menyebabkan sentimen pelabur boleh beralih arah di masa hadapan dan akan menyebabkan volatiliti dalam kadar pertukaran ringgit. Sungguhpun demikian, kesan ini dijangka memberi impak yang tidak ketara kepada negara kita memandangkan struktur ekonomi yang kini lebih pelbagai serta disokong oleh asas ekonomi yang meluas, kekukuhan daya tahan dan peningkatan daya saing.

Sehubungan itu, dalam jangka masa panjang, prestasi nilai ringgit didorong terutamanya oleh kekuatan asas ekonomi negara yang terus mapan. Justeru, Kerajaan sentiasa mengambil langkah pengurusan makroekonomi yang pragmatik bagi mengekalkan momentum pertumbuhan ekonomi negara. Dalam hal ini, usaha untuk mentransformasikan ekonomi termasuk mempelbagaikan sumber pertumbuhan, pembaharuan fiskal dan langkah untuk memastikan sistem kewangan yang kukuh dan stabil akan memberi sokongan ke arah pengukuhan nilai ringgit.

**SULIT**

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEEMPAT,  
PARLIMEN KETIGA BELAS**

---

**PERTANYAAN : LISAN**

**DARIPADA : DATUK JUSLIE BIN AJIROL  
[LIBARAN- BN]**

**TARIKH : 17 NOVEMBER 2016 (KHAMIS)**

**SOALAN (NO. 17)**

Minta **MENTERI BELIA DAN SUKAN** menyatakan pengiktirafan tinggi atlet paralimpik negara sebagai ikon Malaysia bagi pencapaian yang luar biasa wajar difilemkan bagi menaikkan semangat yang berterusan kepada rakyat Malaysia, terutama golongan belia.

**SULIT**

**JAWAPAN**

Yang di-Pertua,

1. Untuk makluman Ahli Yang Berhormat, satu dokumentari khas yang bertajuk "**Kisah Kami Luar Biasa**" yang memaparkan kisah hidup, perjuangan peribadi dan kejayaan pemenang pingat emas Sukan Paralimpik Rio 2016 iaitu Mohamad Ridzuan Mohamad Puzi, Abdul Latif Romly dan Muhammad Ziyad Zolkefli telah pun disiarkan oleh saluran sukan Astro Arena pada 8 Oktober 2016 yang lalu bersempena dengan Hari Sukan Negara. Dokumentari khas bertajuk "LUAR BIASA" juga telah ditayangkan di saluran RTM 1 pada 29 dan 30 Oktober 2016 yang lalu.
2. Kementerian Belia Dan Sukan yang menjaga kebajikan atlet dan jurulatih sememangnya mempunyai mekanisma tersendiri dalam mengiktiraf kejayaan atlet-atlet serta jurulatih-jurulatih yang mengharumkan nama negara diperingkat antarabangsa. Walau bagaimanapun, Kementerian percaya bahawa akan ada pihak yang akan tampil untuk memfilemkan kisah kejayaan atlet-atlet negara di Sukan Paralimpik Rio 2016 sebagai inspirasi kepada golongan belia mahupun golongan OKU sepertimana kejayaan filem OLA BOLA yang memaparkan kisah skuad bola sepak kebangsaan yang layak ke Sukan Olimpik Moscow pada tahun 1980.

Sekian, terima kasih.